

摘藻堂四庫全書薈要

集部

欽定四庫全書薈要

集部

御選明詩卷十三

四

詳校官原任主事臣李斯咏

欽定四庫全書薈要卷一萬八千五百十三

集部

御選明詩卷十三

樂府歌行十

陳于廷

古別離

三歲為君婦未嘗下高堂一朝遠送別佇泣官道傍君
行官柳青君歸官柳黃與君別經年相思莫相忘行過
無定河莫飲無定水天涯遊子心飲之恐爾爾應思閨

中人容光易摧毀

呂大護

陌上歌

春風度綺窗春眠困繡牀誰家競蠶作聞歌陌上桑

紈扇歌

郎道秋氣悲儂愛秋風涼只知換羅綺不慣搥衣裳

曹學佺

荔枝歎

去年荔熟初營閣
今歲閣成風雨惡
他處蕭條尚可言
忍向閣中看荔落

十八娘家粉黛殘
玉肌羅帳淚闌干
楓亭三日無消息
馬上空歌行路難

嬌羞十五閉房櫳
風雨無端妬守宮
玉鏡臺前倚惆悵

郎家不送荔枝紅

閩俗女子將嫁男家
先一年送荔枝紅

夔府竹枝詞

早看東南莫看西
蜀天只怕上頭低
東邊日出純無用

雲暗土頭三尺泥

君居北井妾南沱對面相看隔路多
須趁漁舟過急峽
還隨鳥翼上斜波

今日峯高雲束腰平平一掌在明朝
朝來出門又如是
儂是好言郎莫焦

沿江坎上即田疇滿店燒春酒氣浮
我眉五月雪消水
剛讓儂家割麥秋

陳邦瞻

湖鴈篇

秋山落葉聲瑟瑟遠水浮天天一色日暮惟見平湖深
扁舟遙界天光碧此時南鴈正為羣此際悲鳴斷續聞
幾處淒酸叫涼月數聲嘹唳破寒雲雲破天清月浸沙
無端哀咽向蘆花早梅暗落高樓笛楊柳驚飛出塞笳
幽修似伴魚龍語更共啼烏催窗曙思婦天涯夢不成
征人故國淚如雨曾說聽猿易斷腸那知聞鴈重悲傷
九秋霜露寒更苦千里關山夜獨長塞北江南天浩浩

斜飛欲盡衡陽道足下何曾寄客書聲中只解催人老
人生真憂是別離他鄉霜月易成悲誰家錦幌銀屏夜
過盡寒聲獨未知

江南樂

清明乍出遊風日不曾惡何似桃花飛道是羞儂落
桃花亦太早妾顏亦太好早殺不耐春好殺不耐老
門前潮水來朝來暮還落動作經年行始悟歡心薄
鷓鴣南枝鳥愁隨北鴈去儂家是江南但愛江南住

畢懋康

東茅行

候人何太苦早晚迎官府閒積數根茅為炊且結宇官
府中夜行不絕吏呼聲燃火照官路猶云火不明燃茅
茅無束次第拆茅屋官府猶未知宵征車輾輾

范鳳翼

采蓮曲

水雲香處低聲唱羅襦不辨翠荷樣玉手垂垂藕不如

輕盈欲步蓮花上

含意亭亭立秋水不愛蓮花愛蓮蕊
蓮花欲隨愁殺人
蓮蕊偏如年少子

采蓮湖水湖光曙小舟櫂破雲深處
荷風忽揭錦襠開
翻身一道穿花去

采得蓮來恣郎取翠眉一蹙淚如雨
郎只貪蓮帶露甘
可知蓮子心中苦

古意

新調楚江秋絲肉聲相和一曲彈未終
羈人淚雙隴

黃汝亨

自君之出矣

自君之出矣流涕沾裳衣願為車下塵隨君車上飛
自君之出矣楊柳垂河塘眷茲春時青常恐秋來霜
自君之出矣荷花發清池隴為水中泥結為藕中絲

阮自華

烏棲曲

霞帔雲髻迎風立
柏梁臺高月如璧
上陽花枝笑早春
瑤林瓊樹避玉人

東飛伯勞歌

烏欲西飛兔東走
恍惚令我至百年
誰家穉玉網戶前
明珠煜煜流紫煙
茱萸細錦燦明光
織成翠帔金鴛鴦
年如明月方二六
清暉漸盈手可掬
春光零落花飛揚
白首可憐誰斷腸

楊柳枝

送路經春金線長鴈歸欲寄淚千行分明不是宮車陌
閒誤風前作曉粧

一天春色香溶溶十二巫山悄黛屏楊柳嫌人腸未斷
更將風雨著娉婷

綠塵初暗大堤邊弱質絲絲風雨前情向東皇休再發
莫教重上廣陵船

尹伸

叙南曲

七星歷歷面煙鬟
千佛巖頭翠岫斑
水合雙江波浪闊
浮來塔影是東山

鎖江北渡入涪溪
亂石叢篁路欲迷
太史遺文殘碣上
武侯荒廟夕陽西

劉世教

古意

高樓有思婦
光采瓊樹枝
陸離雙玉佩
明珠綴巾綦
摻摻出手爪
哀哀寫芳辭
清商未終曲
聽者淚已滋
良人

無故懽賤妾無前期空憐夜夜月流影過重栢

王衡

西湖竹枝詞

踏踏吳歌十二時油車白馬客參差自從風雨西陵歌
翻却楊枝唱竹枝

菱田高與稻田齊野井螻蛄徹夜啼若箇竹枝聲最苦
那兒橋北趙園西

高懸十里下風梳白袷青裙次第來怪道竹花簪不盡

五雲山上賽神回

簇簇滿炊菰米飯
娟娟緩唱踏歌詞
為謝西湖蘇太守
桃芽柳眼不須吹

酒盡爐青客未休
脫衣走馬恣風流
西湖亦有橫塘曲
一拍風吹入秀州

請君一向斷橋行
橋下花泥漸漸平
此日風光應不忘
重來寄取竹雞聲

閭門楊柳枝詞

行春橋下是儂家
月月關門不見花
老大爭如少年樂
清明好作柳頭茶

白門楊柳枝詞

白門楊柳解風流
每到花飛更解愁
恰恰斑鷓啼不盡
新鴉又出樹梢頭

粉光亭子日爛斑
欲寄音書好是難
一夜柳花吹不到
大長干隔小長干

渡口無花水半渾
酒旗橫出對橋門
秦淮三月愁如海

莫是桃根接柳根

熊明遇

雉子斑

雉子斑朱冠錦臆羽翾翾朝飲澤中暮未還可畏艾如
張耿介徒摧殘何不高飛遠舉鳴青山

白紵詞

革桂麗服鬱金香微波沅盼嚼清商縱體迅赴舞衫長
明月在天雜鐙光杯盤狼籍夜未央朱絲牢繫雙鴛鴦

天河耿耿烏鵲梁雙星小小漸臺傍牽牛織女遙相望
乞巧樓前枉斷腸轉漏明月低西方隋髻流雲歸洞房

采蓮曲

采蓮涇裏人如玉隔水紅衫罷新浴鷓鴣抱頸喋蓮花
蓮莖猶帶鴛鴦足木蘭舟上浩歌迴婉轉黃鶯初出谷
誰家駿馬駐金塘月照波心空躑躅

公禽

子夜夏歌

青蓮如華蓋明珠朝露鮮風來荷蓋側珠亦不成圓

都城元宵曲

蹀躞驂駟氣正驕垂鞭嘶過玉河橋不知明月誰家怨
腸斷樓中弄玉簫

內園湯火漫相勻種得紅梅放早春莫向樽前吹玉笛
朝來愁殺賞花人

許獬

孟夏陪祀太廟仿顏延之郊祀歌

皇祖於昭賓於帝里照臨萬方匪遠伊邇享祀苾芬陟
降來止其祀維何大輅玉几穆穆皇皇百辟卿士其德
馨香升聞不已皇祖居歆醉飽具起孝孫有顓報以繁
祉自今伊始

俞彥

琅琊王歌

金陵山四圍都城帝王住江水從西來淮水東南注
北面望琅琊可憐盡空闊鹿挺走他山復藉豐草活

淳于王歌

鬱鬱田中禾未熟自成穗沉沉合歡帳獨寢不成寐

讀曲歌

與歡橋頭別楊柳纔垂絲空局不著子尋思未有碁

雍州曲

可憐南雍州形勝山四抱南湖與北渚都上大堤道

作蠶絲

蠶老變作蛹吐絲外成繭但見外綢繆中心無由見

折楊柳

二月江水平
春洲春樹生
垂楊復垂柳
新雨更新晴
蕩子年年別
東風歲歲情

捉搦歌

兩馬異力問輿駒
兩絲異色問離婁
兩狐異草問司裘
兩人異處問蹇修

徐冽

踏車曲

阿伴五更來喚儂踏車去赤日已三商踏車未教住
人言田家樂不知踏車苦憐歡氣力微代歡當卓午
東邊鳳仙花西邊烏桕樹不教儂上車那共歡一處

張鷟

君馬黃四解

君馬黃我馬蒼兩馬爭馳君馬良蹠躩揚鞭入帝鄉

解一

君馬黃我馬黑兩馬爭馳君馬德黃金臺上生顏色

解二

君馬如龍我馬如駒兩馬爭馳我馬躊躇願供天駟敢

畏馳驅人亦有言伏櫪之下壯夫不如解三君齒之新而
我之初振鬣一鳴聞於天都為問伯樂其價何如四
解

榴花曲

灼灼石榴花疎疎五月雨開落不關情浪惹紅裙妬

沈珣

江南春

繁花紅映赤欄橋楊柳新隄繫畫橈三十六陂春水碧

滿船明月一聲簫

范如梓

采蓮曲

風吹荷葉十里香
采蓮女兒矜艷妝
櫂聲驚起雙鴛鴦
雙鴛鴦何處宿
白蘋灣紅蓼谷

左光斗

出塞曲

陣雲橫卷將星高
獵獵秋風動羽旄
揚旆平明屯渭北
銜枚薄暮度臨洮

入塞曲

大漠空高塵不飛
新秋塞上草猶肥
石榴紅綻葡萄紫
博望遙馳宛馬歸

文翔鳳

揚子曲

汎汎揚子津
冉冉離瓜步
生憎一幅帆
載却所歡去
郎是白榆樹
託根種絳河
儂如萍錢子
日日逐江波

隴頭水

誰劃隴水斷誰築隴坂高東流照漢月西流濯羌刀歸
腸欲裂限臨洮人將流水羌西去折柳天山笛怨勞

壽陽樂

壽陽道採樂
府語為四闋

別後莫相忘擲金錢烏衣還亦還

芹泉連壽陽山峩峩子恨子如何

日日儂對歡相憐時不知更夢誰

柳拂壽陽城剪剪條攀折自勞勞

譚元春

讀曲歌

交歡久貝齒有時落歡獨長在口

鄭之文

金陵元夕篇

朱樓隱軫薄層霄淥水縈堤蕩畫橋十里香風吹紫陌
一年明月始今宵今宵無處無簫鼓佳麗名都較得數
美酒留連拚十千少年歡笑唯三五三五年時二八游
箇儂無賴逐風流香輪寶勒紛填巷翠燭紅燈擁上樓

樓前九陌連三市中有侯家通戚里千蝶春星舞袖翻

九枝夜閣歌鐘起歌舞唯應此夕陳魚龍百戲競爭新

銀花絳樹開千丈佛火神燈照百輪花燈在處如人好

半醉筵前看鮑老何容燈前到肯遲何人花下歸能早

花下燈前出畫裙衣香一路暗氤氳不知南陌人如月

且道東門女似雲雲移月隋歡難歇虬水丁東霜漸咽

郎心尚逐紫騮嘶妾意先憎烏桕舌歸去燒燈揔不眠

含情脉脉定相牽餘宵冷焰留紅燭明日芳塵拾翠鈿

王象春

山老鴉

山老鴉朝東暮還西
過河拾杜梨
日晚腹飽不歸去
矰繳已伏河邊樹
爾腹已飽爾不知
飽人之腹良足悲

楊嗣昌

盧龍曲

盧龍城下灤水碧
水中鯽魚長一尺
薊州名酒日夜來
寒宵倚歌曙烟白

盧龍東望接榆關恰有寒風吹客顏一片芙蓉青不落
路傍愁絕兔兒山

李東純

古別離

長安百尺樓其戶銜明璫峒堯入雲中雙闕遙相望明
月照玉顏皎皎流素光中夜理瑤瑟纖指發清商初彈
雙黃鵠再彈孤鴛鴦淒颼動羅幃餘響激微霜仰視河
漢直寒波浩無梁安得高飛翼為君凌空翔

王佐聖

幽蘭篇送黃子羽應召入京

芳蘭生空谷託根何孤清恥與羣卉伍修然挺素莖日
月沐秀華雨露滋芳英一朝辭中阿以之植蓬瀛風姿
益娟妙紉佩當瑤瓊久矣王者香不隨蕭艾榮

李繼貞

吳歌雜曲

桃花落枯井何由笑春風春風爾莫憶吹爾到井中

郎家花滿園誰數柳花兒及郎出門去只有柳花隨隨
郎郎不知

吳伯與

懊儂歌

約郎月出時接難以達曙半夜烏亂啼恨殺窗前樹

沈鳳超

自君之出矣

自君之出矣妝奩日掩塵君心如明鏡獨照眼前人

沈德符

邗城新曲

明月可憐宵曾聽教玉簫佳名二十四第一擣衣橋

別鶴怨

碧天如水海山闊白雲杳靄棲天末凌華拊石歌秋風
獨鶴偃翅唳明月仙轡飄飄游帝關絳節霓旌森恍惚
青鸞一去無消息長夜寒林心欲奪更欲仰天摩蒼冥
神霄紫霧不可掇韓憑自化鴛鴦飛別怨何時雙淚歇

秋日曲

秋日晶晶浮雲白秋風獵獵野煙碧散入園林曉清蒼
蓼花如染胭脂泣鴻鴈欲來蟬罷鳴玉雲珠泣螢翅濕
王孫不歸叢桂寒美人日暮空房入

蔡懋德

湘上行念林雨若歸

宿霧卷太山浩然滄海色中有無數峯奔騰不可得我
欲登峨眉披雲幾千尺下指望林臯煙點梅花白踟躕

念天寒尚疎遠行策昨日鷓鴣裘已贈思歸客

屠本峻

燕歌行

登君罍噐藻井之堂坐君龍鬚琥珀之牀贈君五明七寶之扇酌君紫霞碧玉之漿烹鮮擊肥名吾客秦箏趙瑟鳴我旁世上浮名亦徒爾安有五侯七貴能文章勸君無言舌且藏

朱茂時

黔中曲三首

疊嶂曾無三尺平盤江狹處鐵橋橫短裙窄袖花蠻女

宛在鞞韞索上行

地無三尺平黔中諺也盤江鐵索橋行者動搖而蠻女不懼

土風不改古牂牁銅鼓迎神蹋足歌一種黔南水西鬼

黑羅羅笑白羅羅

白羅羅比黑羅羅更剽險難制

高髻纏髻一尺長淺藍裙子趁時妝一春遠信雞南卜

暗祝心期拜竹王

黔女挽髻雜以馬鬃裙尚淺藍色

甯祖武

吳江竹枝詞

唐家坊藕太湖瓜消暑水肌透碧紗水上納涼何處好
垂虹亭子看荷花

陶允嘉

廣陵詞

桃花新雨後載月出邗溝棗板江南曲筠簾揜子舟飛
飛雙燕子何處覓迷樓

謝三秀

蠻娃曲

蠻娃出戶筠筐隨
琇子穿環帕裏頤
東鄰女伴競相逐
四月深山采葛時
葛葉萋萋葛藤綠
接葛為絲給春服
經絲易脆緯絲柔
裂指猶嫌緝不速
破窗風急寒地生
流黃軋軋無停聲
織成未敢問刀尺
明日輸租應到城
到城杼軸歸公府
吁嗟蠻娃亦良苦
君不見北里春風
歌舞人曲罷羅裳
棄如土

吳稼澄

牆頭草

牆頭草秋零春復抽胡不生彼庭中生牆頭庭中無不
可惡木枝蔭我又豈無野田塍農夫二三月荷鋤將見
陵牆上趨難為階託根高固其荦牛羊欲食不得食牧
豎過之徒歎息

華善述

長相思

長相思相思長幾許黃河三三曲曲曲通牛渚巫山六

六峰峰度神女枯槎不來雲不雨夢落風波安可語
休洗紅

休洗紅洗紅紅可惜初洗猶作黃再洗漸成白紅芳既
去質亦移雖有茜草將安施

海樓篇

上客且歸休我歌送行舟君家近東海海中有瀛洲瀛
洲不可見但見金銀樓此樓誰為之無乃蜃氣浮相望
邈無梁引領成悲愁

濠梁篇

濠水清若虛，鯨魚此中居。鯨魚何所樂，水闊忘呶濡。莊
惠去已久，懷古思有餘。子是梁上人，非魚諒知魚。

今夕行

今夕何夕，露為霜。湖中之水寒，且蒼明月倒落水中央。
溯游從之，葭茨香。雲山層層思難忘，我有故人隔他方。
三年不歸，松菊荒。誰謂河廣一葦杭，爾獨胡為勞我腸。

招隱吟和伯氏

招隱吟寒山蒼蒼日欲沈風來萬木皆蕭森飛泉激石
流清音聽之如玉復如金須臾月出罔兩侵猿鳴後林
鶴前林青松白露光淫淫珠璣墮地不可尋有美一人
薜荔襟橫陳古昔三尺琴一指未下意已深廣陵之散
愁人心抵節高歌招隱吟

宋登春

擬宮中行樂詞四首

小紅亭子白闌干入道宮娥玉作冠袖出青梅彈鸚鵡

銀餅滿注蔗漿寒

碧殿春深瑤草肥
美人對月舞羅衣
夜來不作青鸞夢
化作彩雲何處飛

玉輦春遊夜未央
紫衣侍史謾炷香
黃金鎖合鴛鴦殿
無限春風到海棠

琉璃硯水黃金餅
十樣鸞箋寫道經
太乙紫壇朝帝罷
蕊珠深殿彩花馨

蕩子婦

妾家高樓艷陽春花枝柳條兩鮮新花笑柳條空嫋嫋
不能綰繫蕩人心花容隨貌改柳葉上眉顰唯憂葉落
花飛盡敲碎冰壺歌彩雲

白鼻騮

裏腰白鼻騮婀娜玉鞭斜錦韉明春陌銀鞍拂柳花經
過劇盃飲留醉阿奴家日暮旋鳴轡長安有俠邪

公子行

茱萸錦帶繡芙蓉千金匕首雙蛟龍旋喚燕姬招酒伴

城南蹀躞五花驄

自君之出矣

自君之出矣棄妾漁陽西不及野田雀雙飛還雙棲
自君之出矣腸中車輪轉欲向夢中尋路長春夢短

竹枝詞

行行長千里采采春田花郎君相問訊大樹是儂家
小姑茜紅衫大姑鬱金裙把手促儂去兩兩拜湘君

柳應芳

青溪小姑曲

小姑家住秣陵西，慣聽城頭烏夜啼。
向為無郎嫌出入，不知門外是青溪。

荔子曲

白玉明肌裹絳囊，中含仙露壓瑤漿。
城南多少青絲籠，競取王家十八娘。

安紹芳

柳枝詞

赤欄橋畔柳絲長帶雨和煙揔斷腸肯向西風恨搖落
願留春色待蕭郎

張正蒙

商人怨

江上商人歸試問商人事商人不感言相對但垂淚

張名由

吉貝辭

禹貢故江道今已失其真西亂北入婁浦東接春申中

淤百餘里高飛起黃塵三年棄不治地頗生理殷九夏
耰鋤出三時雨露新吉貝萬餘頃其葉何蓁蓁杭稻產
三吳初不係海濱陵谷日變遷造物亦至仁嗟嗟肉食
謀此理難具陳

何白

溪翁行

溪田犂确河田沃瘠土民勞沃土樂河田多收十斛餘
年年不肯全輸租溪田收薄少生計刈薪賣穀完新稅

春來月出不聞歌
昨朝社飲無人醉
溪翁但羨河田豐
家家甕酒真珠紅

黃克晦

欵乃曲

五虎山如五虎蹲
盡對無諸舊國門
無諸去後山空在
秋草蕭蕭日又昏

微茫星月下江鄉
三十六灣江水長
夜半舟人相借問
好風日出到洪塘

後出塞送陳季立防秋

朔風邊月薊門秋
畫角鳴鳴百尺樓
自著戎衣頻上策
三年不起別家愁

胡宗仁

江頭別

江風今夜寒
郎且江邊住
拂曉上樓看
郎船不知處

桃葉曲

桃葉渡頭桃葉春
家家桃葉鬪妝新
不知何處初來客

未省吳姬會笑人

王嗣經

金陵元夕曲

十二龍城徹曉開
金徒銀箭不相催
行隨燈市家家月
看到花林樹樹梅

王伯稠

子夜四時歌

錄二首

月寒蟋蟀鳴
獨向空庭步
金井雙梧桐
花上有清露

北風昨夜來大雪忽三尺不愁送儂寒但愁斷歡跡

長干曲

月出江頭白鷺飛江花采罷濕羅衣儂家住在長千里
自唱蓮歌伴月歸

莫愁樂

春風吹石城日日喚花開可憐花上月不喚莫愁來

林世璧

擣衣篇

西風白晝已漫漫玉露淒清玉漏殘冰簟銀牀秋弄色
翠帷羅幙夜生寒年年秋夜何蕭索幾度芙蓉楚江落
閨閣佳人團扇悲關山戍客征衣薄閨閣關山片月明
相思不盡擣衣情欲知此夕淒涼思請聽終宵斷續聲
淒涼斷續愁將暮為捲珠簾散香霧翡翠樓邊旅鴈過
鴛鴦沼上流螢度流螢旅鴈為誰飛飛去飛來淚滿衣
敢惜紅顏凋寶鏡還將清夢遶金微金微白雪三千里
寶鏡空懸照秋水啼鳥飛花怨管絃青苔綠蘚生羅綺

羅綺絃歌他自愁
春來秋去幾時休
盈盈巫峽悲雲雨
皎皎星河見女牛
星河巫峽傷心絕
天上人間有時別
寶幄空浮蘇合香
羅衣尚掩同心結
此時憔悴令人嗟
摘盡秋霜木槿花
擣得寒衣向西寄
不知何日到龍沙

秋雲篇贈別郭東臯

雲氣亘四時未覺紫
懷抱如何纔及秋
黯黯滿蒼昊
梧桐一葉從風起
蕭颼秋聲已盈耳
秋雲片片更堪憐
遙逐秋風度秋水
秋風偏促愁懷惡
世情況比秋雲薄
人

生踪跡本難期還與秋雲共飄泊與君相別動經秋握手俄驚大火沕誰知楚澤寒籬日復軫青門折柳愁此時惆悵看秋雲一帶秋山送落曛別後懸悲秋月裏數聲秋鴈不堪聞

折楊柳

榆塞年年別蘭閨空復春東風不相識楊柳滿河濱弄色黃金嫩飄花白雪新折來雙淚落遙寄玉關人

朱應龍

懊儂歌

白舫張青帆載儂歡子去風生柳樹間飄揚落何處

盛鳴世

秦淮月

石頭望月秦淮裏不知月在秦淮水銀漢平鋪一色秋
珠閣瑤樓正相似秦淮女兒十三餘綃幙半捲坐飛除
霜妾星妃兩不如雲中雀子那得住桂樹團團繫舟處
極浦煙波從此去

汪樞

懊儂曲

千金買妾身一旦遠行邁大舩如屋寬底事不相載

姚旅

揚子曲二首

遙望隔水人只見隔水樹知郎未出門烏在樹頭住
望郎猶見樹日落浦煙迷還知郎宿處烏在樹頭啼

高文祺

自君之出矣

自君之出矣不種相思樹思君如春草多在無人處

范湏

板橋曲

板橋斷後無復春蒲荒柳禿波粼粼依稀一片昔時月
來照鴛鴦不照人

采蓮女

采蓮女采蓮涉溪水寧采田田葉采葉蓮有蕊莫采亭

亭花采花蓮無子

滇中詞三首

錄二首

秀海海邊葭秋滇池池上雲悠悠人心恰似此中水
一道南流一北流

駕鴛浦綠水如苔鏡裏人家向背開五月棘僮剗雪去
三冬棘女擔花來

吳鼎芳

竹枝詞

青山是處鎖蛾眉
日日湖邊有別離
却怪煙波三萬頃
扁舟只許載西施

江南一雪苦非常
湖上空餘橘柚鄉
萬樹千頭零落盡
于今那得洞庭霜

怨詩

華屋春將盡
紗窗日易昏
不知多少恨
相見與君言

柳枝詞

綠陰如雨萬條斜
啼罷朝鶯又晚鴉
盡日東風無別意

只吹花點過西家

青谿小姑曲

十五盈盈學解愁
珠簾不捲倚瑩篴
多情明月無情水
夜夜青溪映酒樓

雙燕離

雙燕飛雙飛不隻棲
銜春歸柳巷弄水出花溪
驚風起雙燕離一雄復一雌
一東復一西含啼悲宛轉
顧影復差池
青天一萬里遙繫長相思
峕堯桂嶺不可度雲軒

日暮迷煙霧秋去春來如可逢寧辭萬水千山路

三婦艷

大婦理膏沐中婦啟房櫳小婦獨無事但問落花風丈
人且安卧東窗日未紅

飛樓曲戲東茅止生

飛樓宛轉芙蓉簇對列鴛鴦三十六東風著意渡江來
染出蛾眉春水綠樓頭何處得春先非霧非煙俱可憐
紅芳雜沓錦茵軟塵香不上雙行纏嬋娟花月曾無價

只向嫦娥乞長夜夜長夜短那得分鬱金自繞珊瑚雲
青絲玉壺正傾倒楊柳烏啼白門曉

吳兆

西湖子夜歌

湖女二三月相將戲水涯新堤看楊柳舊堤看桃花
新著杏紅衫試騎赭白馬馬驕堤路窄急為扶儂下
三橋當路半正好與郎期湖水原無信郎來那有時
南峰望北峰如歡又如儂何當雲霧合兩峰作一重

渡頭人眼衆船開不敢要慣知儂泊處不過西泠橋
外湖歌折柳裏湖歌采蓮聞聲不相及意緒風中傳
西陵花深處舊是情人路湖船不出湖願歡尋故步
悔寄孤山梅悔折斷橋柳兩地本無情郎心那得久

沈野

短歌行

推絃拂柱歌我浩曲浩曲未歌腸中躑躅青青前溪可
鑑光儀他心自喜我心自悲河中有船不載客還尊中

有酒不令客歡棲棲何者歸以為期絺衣生蟲鞋襪多
泥世人結交安得常好他鄉寄食安得常飽主人良賢
客興感歎報恩雖易受恩實難野雞喔喔夜長不曉披
衣庭除月沒樹杪士貧者賤客久者貧不如歸去可以
葆真

團扇郎

皎皎合歡扇郎持贈所歡本欲圖親近
翻掩桃花顏

御選明詩卷十三

欽定四庫全書薈要卷一萬八千五百十四

集部

御選明詩卷十四

樂府歌行十一

米雲卿

楊柳歌送唐仲秩

江南二月時楊柳綠華滋高臺不知數臺邊千萬樹紫隄夾岸相映新搖曳朱門翳美人翠樓絲絲爭媚日黃鸝樹樹學啼春啼春不住高下飛金梭亂擲流黃機又

如織女機初斷千絲萬絲分歷亂旋作東郊一片陰雨
中淺淺煙中深迤邐青綃合步障纏綿縷帶結同心青
綃步障大道旁同心縷帶春風香佳人玉笛青樓遠公
子金羈白日長旗亭百座空中曉嫩葉柔枝亘繚繞碧
玉蛾眉怎鬪妍小蠻腰肢徒裊裊君不見楚王宮裏花
盈盈千容萬態學未成春心不死怨猶在只今盡逐東
風生灞陵橋章臺路異代風流那得顧章臺舊日花如
雪灞陵古來多送別眼前景物不得將何以贈君天一

方好向枝頭惜春色莫待傷心秋草黃

董斯張

讀曲歌

儂如一絃琴獨絲纏相交歡如雙耳鼓慮為他人搖

王道通

雷殷殷

雷殷殷兮天欲雨郎之行兮在何許開門南望斷征旅
高山當塗下臨渚羆熊吃哮猩猩語

日高曲

日高風力健花凍鳥聲顫短枕促更歆重羅暖還戀舒
腕抱儂腰迴身對郎面貪睡不成妝朦朧落金釧

齊萊名

夜夜曲

月澀燭無光蟋蟀鳴牀下夜半繡衾寒霜落鴛鴦瓦

采菱歌

駕舫向深潭渡口風正急日暮采菱回煙沉秋浦碧

子夜歌

儂似池中藕，歡如瓦上霜。
日出霜不見，藕斷絲復長。
階前看月光，獨立深深拜。
擡頭花影移，低頭含羞態。

唐汝詢

折楊柳

昔攀垂柳唱陽關，柳復垂絲君未還。
惟有楊花易飄蕩，隨風吹得到陰山。

王龍起

春曉曲

金臺燭盡麝光寒錦帳羅幃繡被單洞房寂寞不忍睡
起看北斗橫闌干闌干倒影珠簾揭銅龍夜泣聲初歇
楊柳枝頭生冷煙芭蕉葉上留殘月廣閣高樓臨大路
碧窗畫棟連朱戶杳杳階除千朵花曲曲屏風半邊樹
樹樹花枝啼鳥多花開花落春風和長衫小袖未梳洗
露氣含香濕綺羅為誰脈脈愁無語印鏡紅顏雙玉箸
此情欲說更難會良人昨日應官去

長夜曲

玉塞遙遙人未到金閨夜夜雞鳴早畫屏銀燭影長寒
寶帳薰籠空自好井牀幽咽轆轤軟離魂乍斷驚眠淺
半枕尋思信復疑迴腸逐與更籌轉芭蕉露墜清聲發
蝨斯絡緯哀殘月窗紗冷落暗生光耿耿含情獨不歇

憶別曲

儂家夫婿雞啼去月冷星寒天欲曙牽衣相送出門前
執手丁寧千萬語良人初心無別意十步躊躇九回顧

吞聲掩袂獨淒咽轉身却入難移步離魂隨馬大堤頭
野煙吹雨長亭路當年景色猶昨日恍惚花開今兩度
花開不是去年枝妾顏不是離別時君心大抵不如故
欲歸不歸遲復遲

烏夜啼

春夢依稀纔半枕月光寒透鴛鴦錦永夜愁醒聽漏長
悄悄蘭缸照獨寢幽蛩漸動聲未已楊柳階頭滴露水
城烏欲棲不得枝盡情啞啞東風裏

陳鳴鶴

楊柳枝

萬緒千條拂翠臺
只牽人去不牽來
楊枝折在行人手
那得楊花二月開

林光宇

陌上桑

秉燭理殘妝
涉露持筐出
為慮桑葉稀
傷絲不成足

徐穎

巫山高

黃金糞牛裂西土碧釵十二驚折股巴猿三咽吊瑤姬
行人淚續襄王雨斲黃蘗製為篙蜀江苦巫山高

貧士行

白蒿青柘頽垣中三日煙爨始得紅故書簌簌委鼠穴
向夕托宿如鵝籠濁醪難賒值蠶月歸來西市餅壘空
吐嗟枳花且多實井底蕙草無春風

紀青

西湖竹枝詞

墓頭堤上柳株株才子佳人搃姓蘇
斜倚石闌臨水照桃花也自愛西湖

阿那曲

一個虛亭倚翠林亭前慈孝竹陰深
白雲落盡花同落半點殘紅無處尋

周楷

漁歌

幽思茫茫看江水何處漁歌江上起一疊淒清愁未終
幾年斷續腸相似南天歸鴈亦悲鳴不到瀟湘無此情

童佩

白苧詞

秋風起白露垂天涯客子夜索衣篋中唯有江南苧一
片銀絲萬行淚猶是前年暮春寄寄時不為秋風寒此
夜却同秋月看

文震孟

擬古遠行

江之陽兮有嶼江之陰兮有渚朝而風兮夕而雨望夫
君兮渺何許春波兮悠悠日暮兮夷猶擘青桂兮為檝
搴木蘭兮為舟况含思兮凝睇乘清風兮遠遊遠遊兮
上下載行兮載舍遵中流兮待君將寄心于遠者

文震亨

秣陵竹枝詞

據牀開印翠微間朝請全稀退食便阿殿也堪成韻致

此中官府又神仙

尚食宮監住直廬
退閒丞相府中居
貂璫一樣中常侍

三日湖頭打飯魚

留都中貴居惟庸故府每歲于元
武湖中勅賜打魚三日名飯魚

秦淮冬盡不堪觀
桃葉官舟閣淺灘
一夜渡頭春水到
家家重漆赤闌干

黎遂球

歡聞變歌

鏡破面自圓
誰能破儂面
天地縱反覆
儂亦與歡見

懊惱歌

歡初戀儂時夜夜門前立今日歡棄儂對人不敢泣

少年行

年少傳聞十二州報人讎盡轉多讎經行不用變名姓
醉卧胡姬賣酒樓

魏學伊

長水怨

為友人
妾賦

妾家住長水長水東西流青青湖畔柳迢迢湖上樓十

三學釵書十四工瑩篔十五臨窗繡精妙世無儔翩翩
少年子窈窕行相求借問樓上女可似羅敷不里姬前
致辭願君且淹留美人好顏色終日樓上頭兼之臨窗
繡精妙世無儔君子謬垂盼聞言中心喜語我長者行
同聲謂應爾郎君美風度玉樹蒹葭倚十九渡長江聲
名若江水好花不獨榮天生合連理行行隨君去默默
思故里牽帷幾回喚低眉羞欲死臨鏡貼花鈿可憐體
無比紗窗春日午脈脈情何已憶我在家時拈香繡大

士金刀剪素綾瑩瑩白於紙刺成蓮花葉彷彿香風吹
香風吹入夢夢到蓮花池繡痕細難識但覺生蛾眉靜
玩坐逾久忽忽心自疑似曾親見佛不知身是誰綾額
尚餘尺皚皚冰雪姿淡濡碧玉毫邀郎為題詩郎書擬
右軍妾心亦委婉鍼鋒與筆意曲折隨郎轉繡罷持示
君秀色堪舒卷顧我每微笑妾顏先自覩落地為女子
可憐側室難陡然一回想心事慘不歡雖復蒙君憐鮫
綃恒不乾大婦貴家女妾身臧獲看上堂伺音聲下堂

候顏色含羞入空房惻惻潛相憶雖然潛相憶無用長
太息誠得君子憐不怨長離隔大婦奄逝世一家身獨
當漂蕩若浮萍隨君流四方南都復北都終歲長道旁
黃金散欲盡不思歸故鄉壯志在四海妾心暗悲傷君
怯不勝衣年來益憔悴十日九卧病奄奄滯旅次妾首
如飛蓬并日忘食事上無姑嫜親下無得力婢旋出又
旋入常恐呼不至憂勞填胸臆刺刺肝腸碎歲月漸消
耗妾身亦不支帶圍日趨緩空復存腰肢事君垂十載

不一生男兒羞佩宜男草悵然心中悲君嘗兩畜婢中
道旋棄之妾身非不容君自輕別離暮春三月盡束裝
謀南歸買舟僅如葉帷幕不得施長夜泊豐草巨蚊攢
冰肌生小長閨閣辛苦實難為入秋弛行李僦人樓上
居小姑家海濱聞之亦來依雖非久居計氣息聊得舒
良人忽生心娶婦支門閭隨珠飾翠幃黃金飾綺疏紅
羅複斗帳寶馬七香車今日媒妁來東鄰有美妹明日
媒妁來西家有西施妾身非木石焉得不孤悽對鏡影

如削安敢生言辭禮數任頡頏難比先孃時新人入門
來灼灼艷威儀二九頗不足二八頗有餘女伴覩鸞幃
嘖嘖相嗟咨君心愛幸絕迥與舊人殊非必顏色殊新
舊自相渝新人哭亦妍舊人笑不如孤房過慰藉眊昧
聊斯須情知心不存詞說空爾為新婚浹旬日忽作南
都游俗語莫空房挽衣不能留新人暫歸寧登車去由
由妾身姊為母同君亦登舟耳綰雙明月隋髻垂金溼
飄飄蕩湘裙色如安石榴輕盈作纖步翩若雲端遊鄰

女相擁簇朱顏自生羞十年方得歸一喜還一愁顧君
色悽慘何用心恻恻莫非眷新昏懷此離索憂千喚不
一荅默默自低頭舟行到長水妾自還家裏親戚往邀
君君固不肯起詰朝云解維舟中須盤桓勿用再往返
各使心中安恐君塗上寒幅巾裁合歡恐君塗上飢烘
粟盈朱盤木落霜露急勿使衣裳單千語囑奚兒勸君
幸加餐平明奚兒至顏色驟驚顫向前往叩問淚流先
被面郎君乞致辭此生勿相見十年恩愛深謝卿重依

戀奈卿久專妒會見中情變不如痛割絕免使腸輪轉
妾身得聞之狂頓摧心肝天乎我何辜天乎真無端雖
在夢魂中不料遭棄捐恨無晨風翼迅駛追君船淚珠
千萬斛那得飛君前牽衣一慟哭身死妾亦甘縱然被
驅遣曷不先一言一去永訣絕何處鳴煩冤自從入君
門歷今垂十年雖彼雞與犬亦當念周旋如何鐵石人
一絕弗復憐椎胸胸血嘔委身赴清水骨肉痛如割
免相救止姊恩父母深我生不如死尚冀南都還重來

過吾里性行吾熟知茲望殆已矣昔年別兩妾我淚揮
不止誰料及我身苦境苦如此嗚呼蒼浪天茲恨何日
已新人入我門繡幃長日垂依稀覩容貌猶未通言詞
臨行詳睇視恰在登車時蚤知生死隔揮淚一致辭念
與小姑別淚落如連珠妾初進門來小姑九歲餘探懷
索果餌髮亂呼我梳今來已成婦骨肉情依依長別不
一語腸斷當何如我有兩丁鬟事我五六年大者髮覆
額小者亦比肩晨興聽呼喚夜深候我眠而今永隔別

涕泗紛潺湲平時解思我料爾當亦然掩淚入房來窗
前見鍼帖殘絲與剝綫寸寸皆儂血向日入君目從今
長斷絕委婉隨郎心郎心大曲折忽見大士像不覺淚
滂沱稽首乞慈悲妾身竟如何今生無罪過宿生愆怨
多安得轉君心春風被女蘿君心終不回不如赴長河
稽首乞慈悲再拜涕漣漉不望重聚首但願相見時雨
落不上天一見知何期婦人失夫心百念無可為但願
新人歡為君生男兒更念孱弱身疾苦不相離舊人識

君性新人安得知十年守窮賤心事多苦悲願君振高
翮及時凌風飛妾身長已矣相見知何期一字一嗚咽
行道皆酸悽

王屋

子夜歌

千金買良玉百金求良工為儂作雙環相連無始終
妾身妾自惜君心君自知莫將日後情不如初見時
家有千黃金不如得郎心家有千倉穀不如抱郎宿

陌上桑

可憐陌上桑朝看沃若暮萎黃
餵蠶不了餵牛羊

朱鷺

自君之出矣

自君之出矣春去勞我思
春去明年來君來定幾時

張大復

少年行

連錢細馬繡纏髮
翻鐙歌鞍踏曉風
鞭指綠楊深樹裏

誰家小袖杏衫紅

葉重華

從軍行

吳鉤雪色滿天山
血戰黃沙萬里還
但願畫圖麟閣上
不須生入玉門關

龔士驤

塞上曲

星漢盈盈望故鄉
夢驚刁斗在遼陽
誰將一片深閨月

散作長城萬里霜

西湖曲

六橋羅綺媚晴霞
綵袖風偏一向斜
四百亭臺何處勝
香車未到莫飛花

黃端伯

從軍行

萬里長城北蕭條
白草荒風沙吹不去
秋色正茫茫
日冷行空壘
天低壓戰場
別來一回首
何處是家鄉

遠落蕭關外陰風萬馬肥至今勞北顧何敢念東歸列
戍傳金柝寒沙卧鐵衣戰場春不到白雪作花飛

魏冲

采蓮曲

北渚采菱歸前溪采蓮去無端隨玉釵記在迴舟處

張溥

孟門行

雙絲繫玉環宛轉生光澤本以結同心何知反棄擲君

家美酒琥珀光紅顏少年坐滿堂酒酣意氣不可當君
家玉堂盛孟門孟門深谷無朝昏中有美人嘯且歌仁
義結客客自多相與醉君金叵羅黃雀銜環報舊主畏
君彈射遠飛去夜深孤棲城北樹

周燦

丹青引贈顧子

山莫畫泰山松松樹已受秦皇封水莫畫黃河滌河流
已非夏后道但作清溪竹樹灣添我垂釣於其間吁嗟

乎男兒少壯隨朝彥豈料中年桑海變枉想丹青麟閣
中他人為我開生面顧生顧生爾莫嗔傳神似爾畫逼
真如何貌此尋常人

陳宗之

寄衣曲

前庭踏鞠後庭歌主將功高意氣多不信沙場征戰苦
年年擣練寄金河

吳本泰

西湖竹枝詞

與郎暗約段橋西
早起妝樓欲下梯
宿雨半收晴不穩
惱人最是鶉鳩啼

薺麥青青三月三
看看草色暗湖南
忙催姊妹燒香去
戴勝來時又養蠶

放生池岸柳叢叢
香閣鈴旂四面風
輕薄少年乘醉過
手提射鴨竹枝弓

踏青湖上懶歸家
更愛山行輦路賒
妾上笨車郎跨蹇

西湖十八里梅花

徐之瑞

行路難

太行北上雪刺天
黃河西渡冰塞川
狗屠擊筑各已老
咸陽逐客還游燕
烏丸夜破盧龍戍
越鳥朝棲日南樹
長槍大槩取通侯
安用蓬門事章句

劉永錫

揚子刺船歌

白日隴兮野茫茫家千里兮來遠方壯士何時兮歸故鄉

蔡道憲

湘水清 并序

堵牧游先生為我通州之別賦湘水清長言悲壯
每誦便泣下及我通州不果行返長沙日而先生
已去荆鄂間亦賦湘水清懷之

湘水清紫藤花老鯉魚生使君歸來飲此水蛟龍引汝

兒孫行君歸奈何遲夢君何似別君時一宵魂氣猶如此
此百年變態安可知送我通州君歎息通州欲去去不
得前日君行誰送君使我江頭望顏色丈夫飄然七尺
身今作蛾眉誤嫁人鏡中歌泣鏡中笑斫斷青銅千餘
春湘水清可掬脫君白霓衣自掛湘妃竹岳陽樓下好
東風縱不相思歸亦速同為湘水吏不知湘水深人生
各努力願君放我歸長林

夏允彝

襄陽踏銅鞮

辛苦襄陽女織縑還織素縑成身上衣素作風帆布

陳子龍

小車行

小車班班黃塵晚夫為推婦為輓出門何所之青青者
榆療吾饑願得樂土共哺糜風吹黃蒿望見牆宇中有
主人當飼汝叩門無人室無釜躑躅空巷淚如雨

邊詞二首

大同女兒顏如花十五學得箏琵琶莫向中宵彈一曲
清霜明月盡思家

八城亦是古遼西大燾縣高牙萬馬齊壯士錦衣行樂地
十年無夢到春閨

從軍行

彎弓獨上李陵臺極目燕支秋色來磧路西迴三萬里
青天遙掛白龍堆

吳晉錫

采蓮曲

打槳向西洲迴船入南浦共憐蓮葉香誰識蓮心苦

方以智

企喻歌辭

出門無兄弟結伴枉自多一著鐵襖襠淚下將如何

折楊柳歌

男兒辭父母涕泣對妻子女兒辭父母涕泣心中喜

西平樂

往來輕薄子與我相知
新贈我青銅鏡欲得鏡中人

橫橋曲

謝公墩後誰家女
登樓竊對紗窗語
單衫金脫忽開窗
柳絲羅帶一何長
手持紈扇羞掩面
紅塵路落桃花香
桃花流水春相送
橋頭酒薄西風痛
金谷還添碧玉愁
東山太傅難逃夢

黃澹歌辭

帆檣過廣州夾岸楊絲垂
楊花向西飛郎獨不東歸

折楊柳歌辭

郎持珊瑚鞭直至楊柳北
但聞連錢聲不見郎顏色
北風河上吹楊柳自生煙
不及鐵連錢常在郎膝邊

碧玉歌

我本小家女自名為碧玉
感君無限恩為君歌一曲
塘上芙蓉花今朝不如昨
涕泣為君言異日莫相薄

華山畿

河上立河水向東流
不若儂心急

城上鼓夜深犬不鳴明月當三五

采蓮童曲

扣棹使兩槳采蓮一時歸傍有雙鴛鴦隨我東南飛

石城曲

採花插雙鬢翠錦褱貂裘持錢百餘萬飲酒城南樓
誰駕六萌車還揺七寶扇車中有玉人以扇自掩面

莫愁曲

石城有美女自名為莫愁不知愁愈多故與少年游

短衣在艇子送歡至楚山莫愁善為歌一聲滿江間

潯陽樂

誰謂江水深不若思君心吳楚三千里一望皆楓林

東飛伯勞歌

誰家女兒著羅衣仰視伯勞正東飛不覺含情理清曲
微按冰絃知柱促黃金屈戍控流蘇飛仙髻後大秦珠
倚檻但持白團扇惟恐傍人得相見徘徊獨對寶鏡中
可憐花落從春風

南州行

江岸多垂柳春風春日長美人浣衣處無限雙鴛鴦

湖南曲

湖南日已晚湖北風何涼不見湖船過但聞湖草香

楊白花

三月城南路千里楊花白往來如浮雲日送江南客

擬春宮曲

闌干昨夜怨東風上苑櫻桃雨後紅鏡裏不留春色在

隨花飛出未央宮

西洲曲

西洲休作夢，秋日少東風。
看盡梧桐葉，飛飛暮雨中。

榜人謠

大江東北風，可上亦可下。
四面皆挂帆，使船如使馬。

單恂

桃花引

白鳥灘頭格格飛，曾船咿軋鰕魚肥。
劉郎愛向桃花老。

不遇神仙也不歸

沈光裕

古意

家臨玉河水玉河朝暮流商人能盪槳盪妾到瓜洲

高承埏

蘆臺聖母廟神絃曲

我擊鼓兮潭如神之來兮七十二沽我牲牢兮既薦神
之去兮九十九澗煮水兮海壖紛萬竈兮青煙魚龍安

宅兮風霽毋作詔我民兮報祀有恪

朱一是

桃葉歌

桃葉含桃花花落子稠疊子熟生桃蟲蟲還食桃葉

結交行貽胡四鶴高

生年不滿百戚戚憂終日謀事常苦踈結交常苦密交
密夫如何如以膠投漆不能復相離况乃三歲隔故人
江之南一水渺何極近日鯉魚風吹浪過江北我獲雙

鯉魚提刀剖魚急腹中無素書擲魚長歎息

張煌言

樅陽謠

八尺風帆百丈牽樅陽湖裏去如煙江南米價秋來長
喜殺桐槽賣稻船

沿湖下網蕩湖船網內織鱗錦樣鮮燈火湖光兒女笑
魚秧種得不須田

朱積

采菱歌

芳洲搖曳青蘋晚
蘭橈十里衣香亂
齊寒皓腕鬆金釧
鬆金釧
濺羅衣
蕩輕槳
月中歸

張若義

採蓮曲

夕潮高一尺
花在水中流
朝來潮又高
水居花上頭
桑間怕逢人
湖上怕逢雨
小魚不曉事
唼嚼自相語
出門未幾時
行行亦且止
對面不相識
人影在水裏

儂亦有所思歡亦有所期所期非所思怕與小姑知
一心看蛺蝶風撩羅裙濕水面撲蜻蜓鷓鴣猶自立

烏夜啼

分枝本同樹一高復一低非有遠相隔何亦長相思
同樹固為樂分枝亦未離如何同宿處竟似各飛時
月暗愁相隔月明愁相照相照又何愁有語難為告
天明將復飛復飛向何處雖非此中久曾記此中住
但思居者樂那惜行者哀嫌儂未解意夜夜望歡來

有所思

有所思兮鴈南飛
木葉脫兮百卉腓
風蕭蕭兮露霏微
天萬里兮暮安歸

燕銜泥

登君堂仍故巢
豈無新居實憚勞

吳爾壖

秋風辭

秋風颯颯兮切素肌
華林摧謝兮蛩螿啼
綺席陳兮清

歌闌美人去兮何當還羽蓋飛兮龍媒乘發激楚兮箭
韶鳴采三秀兮餐玉英思綿邈兮遐征歲華荏苒兮何
時平

葛一龍

然諾行

古人之交交以心一語不出然諾深今人之交交以面
然諾雖深中易變古人不可作今人難重陳與君相見
但飲酒酒盡俱為行路人

馮鼎位

升天行

鍊氣服神丹，肌骨俱變更。
竦身上虛空，萬里恣游行。
天門九重開，羣仙起相迎。
上帝召置酒，位我以列卿。
羲和持長鞭，六龍不暫停。
崑崙東南路，日馭所必經。
我種白玉禾，珠穗黃金莖。
烏飛啄其粒，赤輪駐不行。

隴頭水歌四疊

隴水流何駛，征人去何長。
不念金閨月，冷似鐵衣霜。

行人在何處聞在隴西縣隴坂高蔽天長安人不見
悲風似隴樹滴淚如隴水妾念千絲多郎情但一紙
郎未到隴山恨坂不造天郎已渡隴水恨坂不委地

梅花落

落梅處處落寒閨獨自驚東風傳妾恨吹得到邊城
飛爭霜彩明落共冰澌下留得星星枝映郎五花馬
夢郎駕玉麟飛上蕊珠宮恨殺梨花雨漠漠路難通
飛花似飛雪流光如流水夢中香淚揮點點窗前蕊

邯鄲才人嫁為廝養卒婦

妾貌尚堪憐何事辭瑤殿四時有消盈榮華寧久擅
新人憑繡茵舊人倚蒲薦人生願安樂何心計貴賤茅茨
無驚波田原況葱蒨雌雄幸共棲煖熱自相眷浙浙西
北風吹花落芳甸但夢駕鹿車不夢依龍輦

子夜四時歌

紅閨妖冶顏與春相駘蕩山林多竒采明朝船好放
三伏無盛妝香巾拭玉面乘涼見明月似郎合歡扇

清露凝如玉明月皎如燭何處來妙香吳姬解桂襦
暖屋紅地鑪四角辟邪香織手不知冷剪綵鬪新妝

儲福疇

估客樂

估客樂復樂昔遊梅根渚阻潮相對飲飲酒復幾許官
今住揚州數作五城游輸石為篙足篙榜蕩龍舟龍舟
何環環帆檣百丈出帆裁紅越布綠絲為帆絳江風何
曜曜風吹櫂船郎衫子鬱林布袴子作淡黃黃袴戲江

中淚向樊鄧落官為感憶聲敕歌估客樂

周岐

秋閨怨

嫖姚征冀北六郡盡從軍一夜秋風至千家砧杵聞凝
妝愁皓月寒露濕紅裙惟見遼城鴈翩翩入斷雲

郭金臺

定交詞

男兒不自支落葉隨風吹世多離心人摧折相追馳結

交歡笑深久復當知之男兒中斷絕夜歎聲難輟安能
長隨人束躬事磨澀枯魚思天風悲鳥仰後轍托天資
困窮何必苦交結

唧唧行

唧唧復唧唧人定夜闌山南斗北側足窘步來相促逼
中野露零振羽翼遷客苦心聽不得唧唧復何語上訴
高高者天下顧蚩蚩何許斗酒闌干惟予與汝白眼臨
風告無所詩成大叫謫仙聞杯來但喚劉伶舉重行行

君且止夕陽昨照西山紫老龍不驚雲徙徙枯蟬夜嘯
空山裏我欲聞之君塞耳晚浩歌朝強食撫山川動顏
色張鬚禿髮兩無言風雨秋郊露胸臆唧唧復唧唧我
願與君適樂國

田父吟

秋風蕩昊天葉落飄無時上辭連蜷柯下墮青片泥忽
然颺清颺舞蝶盈空垂零落解自慰撩亂春花飛問君
亦何爾物理全無欺葉落交代謝其根還相隨蓬門舊

井竈或得同蒸炊自非召伯仁
剪拜先披枝停車問楓
林照耀仍湘涯

劉城

折楊柳歌

三度入孟津漢兒顏色少
惟有楊柳枝不改前年好

吳應箕

歡聞曲

歡欲聞儂歌儂意忽不樂
寧使歌未終不忍歡淚落

顧景

楊柳枝詞

滾滾飛花下夕陽從前春事一時傷東皇縱欲重收拾
惱殺霑泥更不香

卜舜年

村社迎神曲

旦旭兮矇矓神鴉起兮雲中沐予髮於蘭湯兮振予衣
於惠風潔齋俟兮土公公不來兮勞心忡忡

許琰

妾薄命

妾本名家子幼小受人憐感君明珠贈含羞意不前
左手執書策右手揮鳴絃皎皎明月光苦憶嘗纏綿
恩情恨不久韶華無盡年忍作待嫁衣甘為他人妍
君故未相知妾意殊不然有聲當徹天有淚當徹泉
待醒深閨裏風光寧久懸

嚴焯

長相思

長相思在夢中自君之出羅幃空窗前淅淅來朔風滿
天霜雪鳴孤鴻楓林青兮關塞黑終然萬里魂難通長
相思何時終

施武

滇中竹枝詞 錄九首

鳳羽詞

鳳羽
山名

鳳羽低連鄧睽川山頭流水屋邊田額尖新樣姑姑帽

五月羊皮帶汗穿

鄧暎詔名姑姑帽滇人皆以羊皮繫額寒暑皆披

街子詞

滇中以作市曰街子逢辰亥戌未日為期

豬街纒罷又龍街蠻女牽羊入市來背上擔兒嘗慣負

胭脂零落小桃開

土官出山詞

土官唯參謁官長始冠帶居常但阜綾青布裏頭

嗚嗚牛角滿山陂腰下橫刀弩箭隨雜部椎頭皆束帛

阜綾纏額長官司

煮鹽詞

滇中鹽井四唯黑白二井課稅甚多餘不及焉

使君不及鬱林廉舊例逡巡新例添白井爭如黑井好
一斤水煮半斤鹽

歸化詞

滇中山茶天下第一唯歸化寺者其本合抱花大如盂國初已前物也往

來官游羈客留別交好至此莫不隋淚

鴛鴦夢斷綵樓空馬首蕭蕭故向東歸化寺前多少淚
年年三月蜀茶紅

麗江詞

麗江府即古笮國地也地寒五穀稀少唯良金毛布之類方伯用貢金必

索其直從來直指公皆不按其地聽之而已人皆耳上貫環好衣紅與西域相類

麗江水繞雪山寒郡縣羈縻異國看千里羅夢山名無貢
賦黃金有價不輸官

永昌詞

永昌古哀牢國也國初流配獨多吳人故語言風俗宛似南都為滇之首

郡

漢武窮邊開永昌哀牢部落散丁當流人不學花蠻語
城郭風煙半建康

寶井詞

寶井在姚關萬里外非容易至販寶者止於緬中交易緬中多瘴癘除三

冬初春通夷者不敢出

緬中花落滿蠻山千兩鴉青馬上還寒食雨飛防瘴癘

漢人不敢出姚關

鴉青寶名時適有是寶
重一兩三錢價三十貫

賣雪詞

大理蒼山雪六月不化市上
女郎賣之猶吳下之賣冰也

雙龍關裏百花香銀海逶迤挹點蒼六月街頭教賣雪
行人錯認是瓊漿

林雲鳳

行路難

上客且莫餐聽歌行路難
茹荼知味苦食梅知味酸
蜜

中亦有螫棘中亦有蘭人情反覆君自看泣者未必感
笑者未必歡曲如羊腸鬱以盤令我喟然摧肺肝

夏完淳

楊柳怨

東風初度春江曲大隄花草參差綠昨宵煙雨盡傷心
今日鶯花空滿目有客扁舟迴自傷一江春色半垂楊
始知啼鳥皆牽恨不是征人亦斷腸

朱樵

羅敷行

陽春二三月陌上桑青青晨妝爰求葉提籠陌上行使
君何方來停車為妾下妾身非楊花不逐東風嫁使君
明大義堅貞古來許賤妾誠失身使君亦何取

團扇詞

截玉白團團輕搖特地寒西風纔入戶便作過時看

吳騏

烏棲曲

丹霞初散明蟾吐採蓮歌發芙蓉浦羅衣玉腕自操舟
那能相遇不同游

月光西轉斗橫天郎今欲去向誰邊蓮舟繫纜垂楊樹
樓鳥驚起雙飛去

玉杯酌酒出宜城含羞坐對九枝燈酒酣燈燼夜初殘
解衣薜澤散幽蘭

搖搖花影紗窗白錦衾相對深相惜日高猶未啟朱扉
不須惆悵汝南雞

明下童曲

遙聽馬蹄聲沈吟知是汝停機出相看脈脈各無語

陌上桑

望雲中見真人駕兩赤龍乘飈輪解一邀仙輿祈長年賜

我靈藥一玉杵解二服神丹忽飛昇手排閭闔登紫清解三

謁木公朝寥陽爵以上卿佩瓊章解四建赤幢握神符山

海百靈為前驅解五驅百靈壽萬千天地雖老我少年解六

紫駟馬

獵犬逐猿猴
猿猴躍上樹
嫠婦嫁鰥夫
滅燭無他語

欲遊南山行

玉食獻至尊
播植由農夫
犧牲享上帝
豢養以束芻
泰山賴林麓
漸以成巍峩
大聖擇芻蕘
百姓興謳歌

公無渡河

公無渡河公竟渡河
豈不忠言公勿聽何
公無渡河公竟渡河
公竟已矣余將奈何
公無渡河公竟渡河
生亦何為余將渡河

楊白花

金陵春盡日楊花飛滿天東皇太乙竟何往坐令爾輩
恣狂顛長干女兒淚如雨傳語楊花且教住本是我家
池上生何忍飛騰渡江去

搗衣篇

碧鴛瓦上霜華微白馬河邊秋鴈飛薊北征人尚未返
雒陽少婦搗寒衣雙絲越練光如雪開筍展衣腸百結
文砧桐杵響初傳靜夜空庭音易徹疾徐高下宛相同

怒如標擗恨難窮
愁心自訴光
明月淒韻應隨斷續風
風前月下砧聲度
斗轉參橫猶未卧
撩亂流螢各自飛
纏綿絡緯能相和
回思夫婿未從征
燈前笑語若為情
錦衾煖覺幽蘭氣
角枕微聞隋珥聲
那知離別生淒惻
剪刀針線長相憶
歲歲空傳薊北書
年年用盡閨中力
坐久新寒透被綾
遙憐塞外更難勝
受降城上思鄉淚
今夜應知半是冰

流螢篇

太液池邊梧葉秋長信宮中團扇愁千門沉沉魚鑰靜
數點飛飛螢火流隨風宛度芙蓉幕決起還依青瑣樓
翠袖撲來光未定綺窗深閉影還留深宮長夜迴難眠
流螢坐對更悽然枝上虛疑烽火樹釵頭空訝夜飛蟬
回思昔侍君王讌中宵歌舞何曾倦不夜珠明白玉牀
守宮紅褪披香殿此時白露透微涼此時螢火度宮牆
那知歲序多遷次那知微羽動悲傷只今寂寞深宮裏
流螢暗逐秋風起輦道偏分腐草光金塘亂點芙蓉水

遙聽昭陽鼓吹頻十圍龍燭進瑤樽燭花不及流螢影
猶有微光來照人

顧開雍

滇南月令詞

端陽采菊

菖陽初進石榴卮忽報黃花香滿籬總是朱靈分壽縷
長生先試傲霜枝

六月賣雪

蒼嶺六月曉寒生雙鳳橋西賣雪聲銀椀盛來調蜜咽
冰魂淨洗齒牙清

七夕桃花

月下穿針乞巧歸玉階露染素秋衣長河尚有桃花浪
紅暈偏侵織女機

重陽折梅

摘得黃花換綠醪登高偏到寄梅亭那知白鴈哀鳴急
吹入羌中笛裏聽

雪夜聞雷

飄飄白雪散優曇雷鼓聲聲破蔚藍西近瑤池寒暑斷
阿香素女共朝參

陳鴻

秋夜曲

悔却與歡期空房香燼時那能如寶鴨冷煖腹中知

典衣曲

典盡衣難贖隣家夜搗砧那堪風露冷兒女說秋深



御選明詩卷十四



總校官庶吉士臣侍朝

校對官檢討臣蕭九成

謄錄監生臣傅瓌芳